



QUÆSTIO MEDICA,

*Quodlibetariis disputationibus manè discutienda in Scholis
Medicorum, die Martis 22^a Februarii 1718.*



M. JOANNE BOUDIN, Regi à sanctoribus Consiliis,
Serenissimorum Delphini & Delphinæ, dùm viverent,
Medico Primario, necnō Regis perpetuo Ordinario,
Scholæ Decanorum Antiquiore, Doctore Medico Pari-
sienfi, Præside.

Est-ne Pectoris Hydrops Arte Medicâ sanabilis?

I.

QUÆLIBET in singulis partibus, vel universo corporis ha-
bitu, aquæ congestio, Hydrops dicitur. Varia tamen, seu à
materiâ morbi, seu à collectionis loco, induit nomina. Hinc, si ma-
teriam attendas, Pituita Anasarca, lymphæ Ascitem, flatus Tym-
panitem constituit; quæ propterea ab Hippocrate & sicus Hydrops
nuncupatur. Si verò congestionis locum spectes, in capite Hydroce-
phalos, in thoracis cavo Hydrops Pectoris, in scroto Hydrocele vo-
cari solet. Unicuique ex his affectibus sua sunt signa, quibus facile
dignoscitur. Est enim Anasarca, seu Leucophlegmatia, quæ unum &
idem sonant, universa totius corporis intumescencia, in quâ pedes
maximè vesperi & ab exercitatione tument, sæpe enim præsertim ab
initio, manè & inter somnum dissipatus tumor evanescit: Deinde,
neque facies, neque brachia, neque abdomen ipsum, magis quàm
reliquum corpus distenditur; sed molle sit, laxum & pallidum, dis-
solutum, & quasi sine nervis, vel minimo labore frangitur, omnes-
que ejus functiones veluti languent & hæbescunt. Interim febris lenta,
sed assidua, cum pulsu parvo, crebro & inæquali: urinæ albæ, te-
nues, & omnino crudæ. Ascites est abdominis à quolibet aquoso, vel
seroso humore incrementum, in quo venter sensim impletur, dum
divulsâ laxatâve cute, præter modum intumescat. Interea marcescit
reliquum corpus, urinæ admodum pauca est, eaque sæpius crassa &
rubicunda. Si premitur tumor, compresso Diaphragmate spiritus
difficilis: si verò manibus in utrumque latus admotis, in alterutram
abdominis moles impellitur, fluctuantis aquæ sensus faciliè percipitur,
& ut plurimum audiri solet: Hinc, hujus morbi qui non unico sensu
se prodit, nullum inter Medicos dubium est. In hoc ferè solo differt

A

ab Ascite Tympanites, quòd in eà propter materiæ, flatûs scilicet, tenuitatem, minor sit abdominis gravitas, licet eadem in utrâque amplitudo: est enim in hac Hydropis specie venter parùm fluctuans, sed rugitu quasi obmurmurat, percussusque ut tympanum tinnit. Rarò quidem hic morbus ægros invadit, sed semper cum periculo. Non etenim flatûs in abdominis cavo congesti latent, sed inter musculorum & membranarum fibrillas compressi coërcentur, non absimili modo quo Lanii animalium carnes folium ope distendunt, unde aër nullo artificio eruatur: Hinc, frustrà acu triangulari abdomen à Chirurgo secaretur; unde apertâ, solùmmodo unâ vel alterâ vesiculâ, nihil vel parum aëris erumperet. Vix tamen credas ullam fuisse sub abdomine sinceri flatûs congeriem, sine aquæ vel serosi cujuslibet humoris permixtione. Tametsi in maximum discrimen veniunt, ut plurimum, res ægrorum, qui quâlibet Hydropis specie afficiuntur; ne putes tamen ullam illis spem reliquam esse salutis, si præsertim Artis Medicæ peritos nacti sint, qui naturæ modum ingrediantur, consilia, ductum, cursum & intentiones, quibus comites se præstent & adiutores, quidni & ipsam emendare idoneos, si quid peccat, & noxium molitur aut vitiosum. Veram cujusvis Hydropis causam quæris? In promptu est, vasorum nempe seu sanguinem seu lympham deferentium distentio nimia, quâ serum in corporis habitum vel cavitates cogitur. Hanc autem inducit turbata circuitûs facilitas, æqualitas, perennitas, quâ tardati, hærentes, & minùs subacti liquores in vasis resiliunt, & cuneo quasi factò, in partem aliquam depluentes, longè latèrque diffunduntur. Est igitur serosa colluvies Hydropis materies, non causa, quæ in inconditò, inæquali ac devio liquidorum circuitu reponi debet. Hinc faciliè intelligas omnia hujus morbi symptomata, initia, progressus & finem: Si etenim vel bibendi, vel comedendi licentiâ, quam stimulant mille cupediarum irritamenta, factum est ut præter modum vasa tumeant, tunc exuperans sanguis, succisque gravis, suâ copiâ factus inops & sui impotens, tardabit gradum; unde serum non factò impetu, sed in mille partes divisum, stillatim & sine sensu diffluet. Hæc eadem præstabunt animi pathemata, vigiliæ nimix, immodicæ exercitationes, liquores spirituosos liberaliùs exhausti, cibi acres, acuti, æstuosi, quorum succi pugnaces, tumultuarii, sulphurei, salini, & in fermentationem proclives, mille modis vasorum tunicas laceissent & vellicabunt, quarum corrugationibus pars tenuior, serum scilicet, in partes subiectas faciliùs irruat. Inde fit ut homo mille ægritudinibus obnoxius vix momento cesset ab incommodis, dum brutorum organa, licet ejusdem artis & industriæ, non minùs composita, nec motuum legibus minùs subiecta, tam rarò à functionibus discipi periclitantur. Hæc præstat solemniss æquæ ac universalis impotentia gulæ, dira generis humani carnifex, quæ inter plurimas nocendi artes, duabus in primis sanitatem corrumpit, ingluvie ciborum & delitiis. Hinc nascuntur Hæmorrhagiæ, quibus sæva & lethalia symptomata succedere solent, non minùs periculosa, si ab earumdem cessatione se prodant. Hydropis cujusvis originem, ut decet, scrutando, hanc ab evacuatione sanguinis quâdam deficiente

manantem comperies ; unde nullum ex morbis invenias , sanguinis eruptionibus , quâvis ex parte contingant ; obnoxium magis quàm Hydropem. Quæ omnia , cum obvia sint medentibus , palam faciunt quaslibet hujus affectionis species à devio sanguinis aut lymphæ circuitu natas. Succus nempe nutritius suis officiis defunctus , quæ partium roationis sunt , in fumum ut plurimum expirat. Verùm , quemadmodum halitus illius inconspicui materies , vel per se , vel aëris frigidi occurfu spissescens , paulisper in serum , seu sudorem corporatur ; sic quâvis de causâ stagnans , morata , lentescens , in serum vel pituitam coalescit. Hinc paulatim pluuunt tot aquarum imbres , & quæ sub sanitate fuerant madoris fontes , partes singulæ , sub morbo in cataractas solvuntur , seroque exundant. Hinc manat Hydropis cuiusvis eluvies , dum scilicet sanguis ipse sero mergitur , quo undequaque perfillant vasa , & universum corporis habitum , vel cavitatem quandam peculiarem aquæ subeunt. Non aliam esse Hydropis fœci causam suspicio est non mediocris. Si etenim succum illum , qui modo in serum liquatur , ultra modum attenuari contigerit ; tunc non vaporosus odor per partium cava exhalabit , sed salacior erumpet & impetuosus spiritus. Tandem ventus erit in cava erumpens , tumens inibi , rarefactus & arietans.

I I.

INTER Herculeos morbos & serè immedicabiles meritò recensetur Hydrops , cuiusvis naturæ sit , qui ægros tot periculis obijcit , & quò tandem abeunt cuiuslibet classis fuerint morbi. Quantò magis periclitantur qui pectoris Hydrops laborant , in quibus id loci occupat aquæ congestio , ex quo nullo artificio , nullis medicaminum turbis expugnari valeat. Est enim thorax in corpore humano , instar insulæ , cordis , pulmonumque sedes , respirationis organum , ex quâ vel minime læsâ emergenda esse generis omnis symptomata abundè intelligitur. Quid enim incommodi non nasciturum est , si difficilis trahitur spiritus , vitæ autor perennis , & præcipuum sanguinis circuitus instrumentum ! Brevi futura sunt omnium moruum errata , & quidquid vitii lentescens capiet sanguis , impulsione necessariâ cæteris è sinu suo fluentibus succis impertiet , quandoquidem omnium eadem est series , idem circuitus. Hinc cum sit utraque pectoris cavitas quoquoersum occlusa , inferiùs clausa diaphragmate , costis utrimque obturata , musculis membranisque intus munita , vixque ullum in se aditum præbeat , quo semel congesta aquæ copia educatur , nihil medentibus propius est , quàm eò omnia Artis tela dirigere , ut imminentem & proximè in thoracem erupturam feri colluviem totis viribus avertant : sive id operis committant Catharticis , & hanc per alvum educant Hydropis materiem ; sive in partem laboris vocentur diuretica , aut sudorifera cæterarum evacuationum loco sufficiantur , quæ per vias urinæ expellendæ , vel sudoribus eruendis dicatas , serum istud devium confestim abducant , & foras eliminent. Attendat igitur Medicus grave quodvis symptoma unâ cum oriente vel potiùs imminente morbo se prodens , & in hoc pugnando naturæ ut quid delinquentis Ministrum se gerat. Id tempestivè factum existimet , si primo , quem adhuc naturæ vis ex-

habet, morbi insultu, id medicamenti præsterit; quod non cum ægrotantis labore & periculo, sed cum euphoria & levamine vim suam exerceat. Insignis igitur sit illius sollicitudo & indefessus labor in investigandis, signis quibus periculosi istius affectus primordia dignoscuntur. Enimvero in auspicandâ appositè morborum curatione totâ medelæ felicitas sita est; & è contra, si inter initia graviter delictum fuerit, damnum indè emergens vix posthac resarcire dabitur. At ista non juniorum & in Arte novitiorum judicia sunt, non agyrtarum aut imperitorum conamina, sed eorum quos docuit morborum usus, firmavitque naturæ meditatio. Videbunt illi nascente, ut ita dicam, morbo, quænam sint viæ quibus avertatur dum imminet, & restituatur vel minimum læsa functionum integritas. Scrutabuntur in primo ægritudinis puncto, num in ascendendo difficilior sit spiritus, & simul ingruant pedum inflationes, intelligentque tunc lentescens in pulmone humoris culpâ, in inferioribus partibus has committi succorum tarditates. Suffocato enim seu strangulato intrâ pulmones sanguine, & fractâ in hac præcipuâ circuitûs officinâ impulsione vi ad ultimos vasorum fines, succorum reversio sit ignavior, cumulataque tandem in serum cogitur brevi cessurum in Hydropis pectoris materiem. Quid plura addam? omnia morbi tempora suis notanda symptomatis agnoscant. Primis etenim diebus, si seri vel aquæ portiunculæ in vasis mole suâ turgentes, in thoracis cava stillaverint, tunc gemit sub pondere Diaphragma licet minimo, dum pulmones adhuc sui juris, & nullâ seri congerie impediti vires suas faciliè exercent, & ad spiritum seu hauriendum seu expellendum aptissimi officii, sui partes adimplent. Tum ergo proclives & resupini ægrotantes, meliùs auram trahunt, translati scilicet in costas seroso latice, quo Diaphragma gravabatur. Deinde, quibusdam elapsis diebus, auctâque inter pectoris cava serosâ colluvie, pulmones ipsi in aquâ fluctuantes, fluidi crassioris resistentiam vincunt difficiliùs, vixque ad diastolem ampliantur. Inde major spirandi difficultas & dyspnœa, in quâ non nisi elato capite spiritum ducunt, & decumbentes quasi suffocantur. Tandem ruente in dies lymphæ stillicidio, aquæ mole jam cumulatâ pulmonis motus coërcetur, nullam ferè æris portiunculam in vesiculas admittens; tuncque videas ægros quasi anhelantes, prono in pedes capite, brachiis pulvino innitentibus, ore aperto, naribus expansis, elatis humeris, aliquid auræ sibi trahere. At si integrâ quæ illa stipatur symptomata virium prostratio eos ad somnum quasi invitos provocaverit; quantum abest ut ista quietis species ipsis sit solamini! Quin immò, quasi submersi & suffocati suscitantur. Inde anxietates, languores, corporis jactationes, cum tussi sicca & inani, cordis palpitatio, pulsus intermit-tens & perturbatus, aliaque hujusmodi signa lethi properantis Prodromi.

I I I.

HYDROPI Pectoris symptomata graphicè à melioris notæ Scriptoribus depicta, frustra attigeris, nisi ægrotantium salutem, quæ unicus medentium scopus esse debet, tandem consulas. Opus sanè difficillimum & in hoc potissimum affectu, in quo veritatem propius in-

tueri negatur, datur tamen odorari.^s Exindè colligas quantà curà sudaturus sis in aucupandis & æmulandis naturæ motibus, aptandisque remediis. Cùm enim debito & recto liquorum circuitu constet tota sanitatis œconomia, morborum nullus est sub quo non acceleretur aut tardescat; quæ, cùm leges sanitatem tueantur, si constant, absentem revocant; si restituuntur. Vides igitur Hydropis initio alvum morari, sisti urinas, siccari salivæ ductus, pulmones sero exundare? Illas ipsas agendi rationes lustrare memineris, quibus natura optima Dux vitæ in regendis ac promovendis hujusmodi secretionibus utitur. Attendas qualis industria usurpanda sit, quâ talis excretio finiendi morbo revocetur. Sed quorsum, inquires, in istis ordinandis labor vanus, aut inutilis sollicitudo? Tardat alvus? urinæ defunt? purgantia præstò sunt, parataque diuretica. Sed leges addit naturæ conatus, quam in instituendâ eligendâque secretionis viâ interpellare piaculum esset. Ambo vires suas consociare amant Natura & Medicus ipsius æmulus & adjutor; inde pendet Artis felicitas & Artificis honos. Iis in medendo carere, cœcutire est: Hinc videas, licet non frequenter, quosdam Hydropes Pectoris laborantes subito quasi & improvise aquarum lapsu ab orci faucibus, divinitus dicas, ereptos. Iis sola opitulatur Natura, quæ quantumvis oppressa & gravata se se à morbo expedire contendit. Si ergo præmissis istiusmodi effluvio omnia morbi symptomata mitescant, quæ prius graviora incubuere; si jam pulmones spiritum ducunt facilius, & resupini in lecto decumbunt, somnumque captant ægrotantes, pedibus intereâ, curibus, atque interdum femoribus in immensam molem tumefactis; numquid censeas id solaminis evenire à dissipatâ aquarum congerie, quæ primùm Pectoris cava deserens, in abdomen cecidit, deindeque in partes inferiores diffunditur. Nonne quemadmodum in ascite jam provectâ ex abdomine præter modum distento irrepit nonnunquam serosus humor in thoracis spatium; infertque eadem symptomata, quæ purulentos solent affligere, sic humor sub thorace congestus, in abdomen & partes deinde subjectas itâ profundi potest, ut omnis aquarum moles è thoracis cavo eruat: tunc certè judicabis esse veram istius Hydropis erisen in tantùm fidam & salutarem, in quantum liberalis & copiosa. Hanc verò evacuationem cùm instituat natura, Artis est à remediis vacare, quò se ipsa recolligat, aut in se revertatur. elucteturve, ut ad relictos aut prætermisos redeat calles: Deinde, num ad purgantium, Emeticorum, Diureticorum, aut Diaphoreticorum turbam confugas eo tempore, quo, exhaustis penè viribus, in extremis languet æger ferè orco deditus? Quantam verò vim inferant in hoc casu purgantia quævis, aut vomitoria, quantos dent Diuretica tumultus, utraque casta erunt, dùm rigentibus adhuc fibris viarum exitus occludetur. Sapientis è contrâ erit rerum æstimatoris, naturam tam bene se se gerentem auscultare, potu idoneo & convenientibus alimentis, sanguinem penè accensum ac inflammatum irrorare, somnumque ægrotanti conciliare, quo vires resciantur, resque ad meliorem frugem redeant. Medicum enim naturæ actuarium putes, qui gesta illius sequatur, qui gressus, qui tramites, qui vestigia notet, de suo addendo nihil, nisi quod illa prætermisit aut malè operatur: Illâ igitur inerte, otiosâ &

delinquente agat quidquid ageret ipsa, si non opprimeretur & adhuc sui juris esset: Tale est quodcumque præsidii genus, quod aquam in thoracis cavo congestam valet eliminare. Id autem siue Catharsi, siue Diureticis aut Diaphoresi præstes, quid interest? dummodò exmedendi methodo rectè & sapienter institutà, quas ratio suadet, & quas confirmat usus agendi rationes, consequaris; sed si plurimos Ascite quantum sevà & gravi laborantes videre est aptatis remediis ad pristinam sanitatem restitutos, si rectè ordinatà paracentesi aut scarificatis cruribus omnis abdominis moles subsideat: quidni eandem sortem experiantur Hydropes Pectoris gravati, cujus eadem cùm sit causa, eadem proinde curationis institutio est.

I V.

ASCITEM, quæ à sanguine omninò depauperato & in serum coacto inducitur prorsùs immedicabilem esse nemo est qui non intelligat, nisi in Arte medendi omninò imperitus. Arguit enim illa conjunctum hepatis aut lienis scirrhum, vitiumve partis cujusvis indelebile, quà sanguinis fluiditas foveri debet, circuitusque servari æqualibilibitas. Solidarum nempe partium culpam emendare, humanæ conditionis est; illas prorsùs everfas restaurare, divinæ potestatis. Sed numquid inde colligere velis insanabilem esse hujus Hydropis speciem? Nullus est inter morbos quibus obnoxios videas homines etiam levioris armaturæ, qui diutius permanente devio liquorum motu & eorumdem confusione, tandem solidis partibus labem non inferat nullis artibus delebilem: nùm ideò judices eos esse immedicabiles? Exemplo sit Febris, morbus humano generi adeò familiaris & ustatus, naturæ conamen quo discordes ab ordine & à circuitu deflecentes succos in viam debitam referat; Si dum illos acrius ferit, ut ductiliores & sequaciores fiant, illi tamen non deterantur, non tenuentur, non subigantur; quin immò nimis contusi & conquassati spissescant magis, nonne tandem longà istà inordinationis serie liquores in ferosam colluviem cessuri morbos immedicabiles parient? Febres tamen propterea tanquam insanabilia naturæ delicta judicare, idem esset ac pro veritate exhibere delirantis phantasie fœtus. Idem de Pectoris Hydrope æstimandum est, cùm enim diutius perseveravit in thoracis cavis aquæ collectio, & sanguis recto ab itinere deflebens totus in serum evagatur, tunc fatiscunt partes solidæ, universa obruitur corporis moles, nullamque spem salutis reliquam esse faciliè intelligitur. At initio morbi, dum scilicet constant adhuc ægrotantis vires, & natura suis vincere & imperare legibus nititur, quamquam vasorum lymphaticorum culpà in thoracis utrumque latus feri copia diffunditur: ne putes tamen istis non posse opitulari rectè institutam medendi normam. Est enim Ars nostra dives, nec unico remedium apparatu gaudet, copiosis æquè ac juvantibus medicamentorum formulis abundè locupletata. Attende igitur in curando Pectoris Hydrope morbi causam, tempora, occasiones, sexum, ætatem, & legibus naturæ accommodatam medicandi methodum instituas, imprimis naturæ ut quid delinquenti succurre, Catharticis urinam seu sudorem promoventibus medicamentis id præstes, ut recens adhuc feri congeries non augeatur. Dum jam istis Medicinæ telis novum prohibebitur diluvium, congestæ in thoracis spatio aquæ, non secùs atque suppurans

plevritis, exesâ succingente costas membranâ, affatim in thoracis cavitatem irruit, sic in abdomen pondere suo depluent, unde in inferiores corporis partes, pedes scilicet, crura & femora diffundentur sub vaporis formâ, per occulta partium spiramina exhalandæ. Sin minus felix sit hæc viâ morbidi humoris exitus, scapello sectis cruribus eliminâ istiusmodi seri rivulos. Tandem constantibus ac permanentibus sævis adeò morbi symptomatis, gravatoque lymphæ præsentia pulmone, ad Paracentesim veluti ad salutis portam & anchoram confugas. Hanc prosperis ægri rebus operationem non semel instituit Hippocrates, quam, nescio quo fato hujus ævi Medici rarò jubent: vacat etenim periculo, si opportunè præscribitur; quin immò ferè unica morbi curatio est. Vetat tamen ne acu triangulari cavitatis pectoris aperiat ad hærens sæpius pleuræ pulmo, cui cæcus pungentis impetus, & inoculata manus lethale vulnus infligeret. Obstat etiam foraminis angustia, quâ commoratum & inspissatum aquæ pondus exitum agrè obtineat. Utumque præstat Empyema; pulmonem scilicet à vulnere tuetur, & quantumvis morâ spicessentes aquas è pectoris imo eliminat, sectâ inter tertiam quartamque costam posterius cute, incisis musculis, laceratâque plevrâ, adituque in thoracis cavitatem facto, quò seri congeries eruatur. Interim maximâ observatione dignum, nùm unico pectoris lateri aquarum gravitas incumbat, aut ambas cavitates occupet. Latus verò in quo reconditur seri copia hinc nosces, quò decumbens æger in latus sanum onus sentit pectori incumbere, ex quo spirandi vehemens angustia, tussisque exasperatur: in latus verò ægri decubitus omnia mitigat, aquâ nimirum in costas recumbente. Quoniam etenim thoracis capacitas Medialino dirimitur, neque dextri lateris cum sinistro ulla societas est, unicuique aquarum congestioni suus debetur exitus. His potissimum præfidiis curatur thoracis Hydrops nunquam deplorandus, quandiù vigens adhuc natura eluctabitur, constabuntque ægrorum vires. V.

LI C E T igitur eos premat nox, Fabulæque manes, & domus exilis Plutonia qui hoc gravissimo morbo afficiuntur, est tamen utcumque Arte Medicâ sanabile quicquid invehit symptomatum in thoracis cavitatibus collecta aquarum congeries. Sed in usum non venit quotidianum hujusmodi curatio; quin immò in Arte peritissimi curam & operam expostulat, Medicum nempe, ut ita dicam, naturæ notum, hujus assuetum ingenio, mores illius sentientem, ejus æmulum & assecram. Morbi causam imprimis scrutetur necesse est; & si quid in victûs ratione, aut rerum non naturalium usu peccatum fuerit, sedulus emendare valeat. Insunt etenim singulis morbis diætæ particulares. Ne ergo Diætæ satisfactum credideris jubendo generatim inter medendum, ut victus euchymus ægris exhibeatur: Elige potiùs variis morborum generibus, occasionibus & temporibus, ægrotantium temperamentis, sexui, conditionibus, item constitutionibus aëris regionumque meribus accommodatum atque attemperatum. In thoracis Hydrope qui nostri instituti est, quidquid seu pulmonibus seu Diaphragmati ponderis inducit aquæ copia, vel Catharticis, vel Diureticis, vel Diaphoreticis ejice. At in istis ad ministrandis ordinandisque optimam te partem elegisse arbitreris, si quò natura conatur, eò ducendum sentias. Si namque, fluente urinarum

ſcopiâ , per renes & veſicam expellenda ſe prodat morbi materies , hanc inſtitutâ Catharſi , evacuationem avertere piaculum eſſet , ſummumque in ægrotantis ſalutem peccatum. Idem de alvi dejectionibus dicendum eſt , quæ ſi cum ægri levamine ſiant , totis viribus promovendæ ſunt , neglecto Diureticorum agmine. Non enim natura ut ſe à nocivis liberet ſuccis , plures ſimul vias aggreditur ; unde omne tulit in Arte noſtra punctum , qui eam agentem conſequitur. Si exeſis Diaphragmatis vinculis , ſeri colluvies in partes inferiores delabatur , ibique morata & inſpiſſata vaſorum meatus non ſubeat , per cutis poros æquè impotens exhalare , ſectis ſeu malleolis ſive cruribus femoribusve certum aquis exitum præbeas. At cave ne jam flaccidæ partes ac depauperatæ in ſphaecelum abeant , ſicque incidas in Scyllam cupiens vitare Charybdim. His opitulantur abundè Chirurgia & Pharmacia , quæ ut ſunt ſedulæ Artis medendi Miniſtræ , manus auxiliatrices præſtare paratæ ſunt. Tandem ſi factò tot rerum periculo , ſi exploratis quotquot ſuppeditat tam dives locupleſque medicaminum Officina præſidiis , ægrotantis ſalus adhuc in anguſto ſit , dùm illi conſtant vires non omnino proſtratae , ad celebratam toties ab Hippocrate operationem confugas. » Ad hoc ægri » velut purulenti in ſellâ collocandi ſunt , & aure ad utrumque latus ad » morâ , ſi fluctuantis aquæ ſonitum auſcultaveris , quâ parte ſtrepitum » edet , eâ ſecari juvat ; & quò faciliùs effluat aqua , quàm poterit , id » fiat inſimo loco opportunum eſt. Hoc præſtito aquis exitu , ſi res benè » ſuccedant , aderit ſpiritus facilior , omniaque morbi ſymptomata mi- » teſcent. Si quinto die linamentum in vulnus pro more inſiſtum pure » jam laudabili obduſtum exeat , ut plurimum ſaneſcit æger ; ſin minùs » cùm aquam eduxeris , ſiti ac tuſſi corripitur , certò perit & denaſcitur. » Non igitur illuc ituros cenſeas , unde negant redire quemquam , quot- » quot ſunt qui Hydrope pectoris afficiuntur. Hujus etenim morbi , ſicut & » omnium quibus genus humanum cruciatur , ſors eſt in ſymptomatum ſæ- » vitate & Medentis indiſtriâ poſita. Creſcet periculum , ſi aliò quàm con- » venit , feratur remedium impetus ; ut etenim partes laxari indociles » aggredi facinus eſt , ab iis exitus indebitos extorquere Artis crimen erit. » Peccatur namque quoties humores qui deorſum vacuari amant , ſur- » ſum deturbantur , quaſi perindè ſit , æqualibusque armis decertare pur- » gantibus aut Emeticis uti ! Idem ſit de cæteris præſidiis Medicinæ judi- » cium , quæ non niſi ex ſapientis naturæ legibus , & periti Artiſcis con- » ſilio , in uſum vocari debent.

Eſt ergo Pectoris Hydrops Arte Medicâ ſanabilis.

DOMINI DOCTORES DISPUTATURI.

M. Jacobus Benignus Voſſius
in Regia Scientiarum
Academia.

M. Joannes Dopinꝝ Peſchard.

*M. Amandus Dentz , Facultatis De-
canus , Reſi à Sanſteribꝝ Conſili-
& Sereniſſima Biturigena Ducisſa
Medicus Primarius.*

M. Ludovicus Guilloz.

M. Philippus Fontaine.

*M. Francisꝟus Geuſt , Academia
Conſor.*

M. Joannes-Baptiſta Fermelluis
in Regiâ Artiſium Aca-
demiâ Secretarius Honorarius.

M. Antoninus Papin.

*M. Joannes-Baptiſta Doye , Antiquis
Facultatis Decanus.*

Proponebat Pariſiis EMMANUEL-MAURITIUS DUVERNEY , Pariſinus ,
Baccalaureus Medicus , A. R. S. H. 1718. A ſextâ ad meridiem.